

C. T. LOO & CO.
41 EAST 57th STREET
NEW YORK, N. Y.

NO. 552

HGT. 4 Vols.

LENG. _____



Digitized by the Internet Archive
in 2016

過雲樓書畫記卷第二

元和顧氏

書類二

趙文敏楷書黃庭經卷

松雪小楷黃庭相傳吾吳有兩本一藏桃花塢程氏一藏石塔頭顧氏亂後程本已失顧本歸海鹽陳君容齋每往訪必出此卷與余共賞近歲其弟良齋始以歸余余按黃庭經松雪臨本至多此卷六十行行廿一二字是臨應中甫所藏太清樓帖本與之相易者故蔣光煦東湖叢書記載平湖錢夢廬天樹跋穎上覆本黃蘭二帖云余昔曾藏趙松雪所臨黃庭經卷後有同時元人

一十五跋內應本跋云得宋刻太清樓本黃庭并禊帖
松雪見之愛不能釋應氏因重模二帖入石自藏舉原
本以贈松雪松雪爲臨此卷以報之故松雪所臨者前
後均有思古齋朱文印記皆與此卷脗合中甫名本錢
塘人外貌鬢鑠有膂力能手搏無與敵者所傳乃劉千
和尚之派卒於至正己丑時年七十八見楊瑀山居新
話今中甫跋稱至正七年年七十有六是歲丁亥後二
年爲己丑正與新話合餘如鄧文原楊載黃潛杜本歐
陽玄元史皆有傳楊瑀字元誠爲江浙行省掾屬晚棲
峰泖間植竹千竿自號竹西居士見六研齋筆記段天

祐字吉甫汴梁蘭陵人仕至江浙儒學提舉王國器字
筠菴吳興人見輟耕錄黃公望字子久宋季陸神童之
次弟也家蘇之常熟子游菴齟齬時與温州黃氏遂姓
其姓見杜東原集柯九思字敬仲天台人官奎章閣鑒
書博士趙奕字仲光號西齋晚居吳中與崑山顧仲瑛
交仲瑛稱其風流文雅有王孫風度而無紈綺故習文
敏三子長亮次卽仲穆仲光其季也見甫田集劉貞字
廷幹終南臺侍御史見梧溪集周鼎字伯器嘉興人見
南濠詩話孔濤王元杰皆無考

趙松雪酒德頌卷

趙文敏爲瞿澤民書此卷定據宋以前本故以今文選
及宋尤袤本對勘異同頗多如庭衢作庭除等字已詳
見阮芸臺考證與孫馮翼補考卷凡廿三行末署延祐
三年丙辰歲十一月廿一日是年七月卽公拜翰林學
士承旨之時公之齒已六十三矣按輟耕錄有云浙江
園苑之勝惟松江下砂瞿氏爲最古山居新語又稱松
江下砂場瞿霆發嘗爲兩浙運使霆發澤民是否一人
予不能知第以地與時按之似是相符意其人必嗜古
媚學故松雪翁爲書此卷耳卷後有徐武功陳緝熙等
跋乾嘉時藏孫伯淵觀察家最久故觀察自書凡三跋

其舊交若法詩龕吳穀人梁山舟黃蕘翁輩卅餘家均有題記覃谿且爲之一再題語目爲趙書最上神品因刻入過雲樓集帖以爲用筆結字師法右軍之階梯云趙文敏草書千文卷

松雪有大德五年爲韓定叟書千文見甫田集此卷爲至元丙戌尙在其前十六年盛年所作宜香光詫爲千文行世甚多未有瀟洒迢紮若此者自跋云吾甥張景亮以此紙求書千文次年馳驛至崇德陳君養民持以見示始知景亮蓋爲陳君求也余按松雪之甥一爲林子山石田集有題林子山濯足圖注云子山趙文敏之

甥有隱操一卽張景亮宋學士集吾衍傳有云錄事張
景亮識之知景亮嘗官浙中又剡源集有集題趙子昂
摹龍眠飛騎習射圖云張景亮是其外甥人欲得之者
多從景亮索覓則松雪法書名畫當時已不易得且介
近屬以求之矣况今日耶卷見吳子敏大觀錄有劉宗
海潘庭玉袁尊尼董思翁諸跋後入內廷有三希堂
精鑿璽石渠寶笈等印

趙松雪秋興賦卷

妮古錄云子昂書秋興賦行書墨蹟一卷筆法全出獻
之其卷向在吾鄉進士王緝之所藏今藏於項希憲家

子昂好書秋興賦行世合有數卷此卷首行秋興賦下
旁注并序二字又書潘安仁三字蓋本文選自首至尾
子昂二字共五十九行每行十字或十一二字舊爲愉
邸七王珍秘有成哲親王跋後歸梁退菴年丈有阮文
達錢泳及退菴自跋稱雲臺師云成邸跋中之愉邸乃
榮郡王郡王乃愉貴妃之子諸王不敢祖天子各以所
出之妃名邸七王書法亞於成邸極爲成哲所賞又以
佩文齋書畫譜載懶真草堂集憺園續集兩跋烏絲
闌錄於卷後皆我朝書苑中掌故也首有高氏及勃
海半印勁如鐵絲必出元印人手殆我青丘子鈐記與

趙仲穆行書洛神賦冊

此式古堂卞氏故物也書考所列厘正統三年七月望
太常少卿忠徹跋余按忠徹字靜思袁柳莊子也初授
鴻臚序班遷尙寶司丞進少卿有符臺外集見明史方
伎袁珙傳今紙尾存袁氏珍玩子孫寶之印可證嘉道
間冊爲梁退菴年丈收藏自爲詩跋又屬覃谿雲臺荷
屋三家跋之覃谿据署款至正六年冬謂是仲穆中年
作在召入集賢之前八年去文敏之卒廿有四年矣復
精楷作七言古詩中有子敬洛神無歲月而此六年題
至正時在集賢侍直前先承旨法彌端勁之句復初齋

考核至精此尤得意筆也余官浙東時得之吉甫同年
一峰道人手書畫理冊

孫雪居舊藏此冊用朱色印格都二十七葉三百五十
九行惟第廿二葉脫去九行以它紙補綴之據末葉署
款至正五年六月廿又七日後學黃公望書時年七袞
又七按先生所撰畫訣注釋最詳見圖繪寶鑑此以炳
燭餘光亟於鈔纂故間有譌字亦未覆檢然其志在鍼
度來學故所言又出於六如居士畫譜所引畫訣之外
凡絹縑膠礬白描墨花皆有定程至界畫篇圖示屋宇
如營造法式期合於高低向背之理而以師心篇或問

一村張子正畫理結之知輿輟耕錄所引先生寫山水
訣有云作畫祇是簡理字最緊要同斯命意矣子正名
中松江人畫山水師黃一峰亦見圖繪寶鑑末附題張
子正所作山水曾載入佩文齋書畫譜中至云其先
世助王室拓開饒漕於鯨波之間爲一代偉事古昔河
渠貨殖書傳之所未載而子孫乃能從於此道然則子
正殆張瑄之後耶梧溪集有張氏石几銘序云几蓋元
故參政公諱瑄園堂中物也成宗朝家沒几爲鄰有幾
六十年而公元孫守中文行日修勵几復焉是其證也
知中亦名守中瑄事見元史食貨志海運篇

虞文靖真書劉垓神道碑銘墨蹟卷

烏絲闌真書百七十九行行八字首署大元故奉國上
將軍行中書省參知政事廣東道宣慰使都元帥劉公
神道碑銘翰林待制儒林郎兼國史院編修官虞集撰
并書碑云元帥諱垓字仲寬河南鄧州穰縣人武敏劉
公整之第五子也考元史劉整傳但云子垣嘗從父戰
敗皆萬壽於通泉埏管軍萬戶均權茶提舉垓都元帥
可據碑正之惟碑中敘垓功伐整傳所無就文考之凡
至元十二年以前史家多歸功於整如碑云至元元年
從武敏戰瀘州紫雲城有功卽世祖本紀至元元年以

元帥按敦劉整等將士獲功賞賚有差也三年武敏入朝以元帥見佩金虎符領武敏舊軍爲萬戶卽本紀四年十一月南京宣慰劉整赴闕奏攻宋方略宜先從事襄陽也四年築眉簡征守嘉定瀘敘等州攻破五獲石城白馬資江等寨元帥又有功卽本紀五年五月癸亥都元帥百家奴拔宋嘉定五花石城白馬三砦也十年出從武敏於襄戰樊城又有功卽本紀十年正月癸亥阿里海牙等大攻樊城拔之也至碑述垓奏先臣在襄陽以呂安撫來歸今爲右丞在瀘州以管安撫來歸今爲左丞臣在西川以管安撫來歸亦爲左丞云云謂呂

文煥管景模皆萬壽等本紀十年宋京西安撫使知襄陽府呂文煥以城降十二年正月癸未師次蘄州宋安撫使管景模以城降六月宋嘉定安撫使咎萬壽以城降賜名順是也碑云十二年奉武敏之喪葬於穰六月還收嘉定紫雲敘瀘等千五百餘里以其帥及蠻部首領入見卽指咎萬壽降事第萬壽降後世祖旣賜名順又以行樞密院任之本紀十五年三月甲午西川行樞密院招降西蜀重慶等處又云西川行樞密院招宜勝土恢等城及石榴寨相繼來降又云十二月己卯簽書西川行樞密院咎順招誘都掌蠻夷及其屬百一十人

內附知當時順行樞密院事碑所云樞密院謂瀘武敏
舊所治奏以元帥領之恐卽出於順也又碑云十六年
入見拜同知四川北道宣慰使司事廿年同知四川南
道宣慰使司事卽本紀十六年正月壬戌分川蜀爲四
道以成都等路爲四川西道廣元等路爲四川北道重
慶等路爲四川南道順慶等路爲四川東道並立宣慰
司二十年二月減四川官府併西川東西北三道宣慰
司知四川自置宣慰司卽拜垓同知北道旋以裁減省
併復拜南道情事宛合又碑云二十一年邱德祖趙和
上謀亂元帥定之又有功卽本紀二十二年正月西川

趙和尚自稱宋福王子廣王以誑民民有信者事覺磔裂以徇知趙和尚之亂垓討平在二十一年磔裂在次年情事亦合特惜垓功伐可稱而僅僅附見整傳不解其故及讀本紀十一年三月戊辰監察御史言江淮未附將帥闕人今首用阿里海牙子忽失海牙劉整子垓素不知兵且缺人望宜依弟男例罷去迺知史家不爲立傳與道園學古錄不存是碑皆有深意續宏簡錄所言不誣也碑爲項墨林高江村趙味辛吳荷屋舊藏有夢樓覃谿詩跋俱見辛丑銷夏記

元五家贈筆工范君用冊

光分顧兔一毫芒。遍洒春芬翰墨場。得趣妙從看劍舞。
全身功貴善刀藏。此郭天錫贈筆工。范君用詩也。載式
古堂書考。而此冊無之。冊爲鮮于樞員嶠真逸趙櫛杜
世學官寶觀子昂贈跋相繼書後。今松雪真蹟已亡。但
據趙跋云。子昂學士稱其一筆可作數千字。而鋒芒不
挫而已。鮮于諸家跋。又稱劉李馮者。李思溫名不甚著。
劉遠馮應科。則元遺山集劉遠筆詩有云。宣城諸葛寂。
無聞前後兩劉新冊勳。孫大雅滄螺集贈筆工張蒙序。
有云。國初此法流傳。吳興自馮應科。陸穎輩首被趙文
敏賞識。孔行素靜齋至正直記云。筆生之擅名江浙者。

吳興馮應科之後近又吳興陸穎是也君用爲筆視劉馮陸良楷無考要是旬濡月禿編如蠶挈者得諸賢提倡當與宣城諸葛並傳矣員嶠真逸卽李侗字士弘官至集賢院侍讀學士見圖繪寶鑑顧又稱李筭嶠河東人官至翰林學士實卽士弘也一人兩見耳

元賢手迹集冊

右元賢手迹集冊凡七家筭江上松子閣中物也後以贈同年楊青岩者其首有松雪翁書回仙觀贊審是偽蹟去之所存倪周顧陶四家載六研齋筆記其餘張與二楊則筆記不載眉公跋亦不言意是江上合裝也惟

筆記云周公謹名密號草牕又號弁陽老人泗水潛夫
殘元時流寓吳中目見僞吳張氏狂圖不遂城破國亡
皆由任用非人淫樂自恣竟殲天戈有足嗤者於雜札
中得其詩數絕皆追悼之作也余按草牕詩有蠟屐集
其序存伯牙琴又有弁陽詩其序存剡源文集今皆亡
佚無從考見唯鄉於倚聲辨香蕢洲笛譜嘗欲刺其撰
著爲年譜一書知實生宋紹定五年壬辰張氏起於元
至正十三年至二十七年而歿苟草牕曰見吳亡年當
百三十六歲以外固知不得因署欵潛夫而疑之也意
潛夫乃錢塘陳振祖明初爲國子監學正者靜志居詩

話謂潛夫於洪武十八年三月曾上書言事載實錄則
淮張之亡爲所親見此詩云次盧先生韻當是盧熊熊
字公武昆山人見書史會要列朝詩集潛夫有盧公武
鹿城隱居詩是其確證又吾家阿瑛及雲林兩札皆云
公武先生想見同時酬唱往還李竹嬾得而合并之耳
草牕年譜附後

宋理宗紹定五年壬辰

先生生於是年五月廿一日見朱存理珊瑚木難
弁陽老人自銘先生先世齊人六世祖芳隱歷山熙
甯間以孝廉徵不就賜光祿少卿五世祖孝恭吏部

郎中知同州贈殿中監高祖位贈大中大夫曾祖祕
御史中丞贈少卿隨蹕南來始居吳興祖秘刑部侍
郎贈少傅父晉知汀州母章宜人參政文莊公良能
女見自銘及王英孫填諱又按癸辛雜識後集紹定
四年辛卯先生父宰富春九月到任壬辰歲先生生
於縣齋

紹定六年癸巳

端平元年甲午

端平二年乙未

端平三年丙申

嘉熙元年丁酉

嘉熙二年戊戌

嘉熙三年己亥

嘉熙四年庚子

先生九歲父住閩漕幕時方壺山大琮爲漕見齊東野語是年父留富沙見癸辛雜識後集

淳祐元年辛丑

先生十歲父守臨汀先生侍親自福建還見齊東野語

淳祐二年壬寅

淳祐三年癸卯

淳祐四年甲辰

先生十三歲外舅楊彥瞻以工部郎守衢見齊東野語先生娶楊氏匠監伯岳女見自銘

淳祐五年乙巳

淳祐六年丙午

先生十五歲父監州太末時刺史楊泳齋員外別駕牟存齋西安令翁浩堂郡博士洪恕齋一時名流星聚先生時甚少執杖屨供洒埽聞諸老緒論見贛州漁笛譜

淳祐七年丁未

淳祐八年戊申

淳祐九年己酉

淳祐十年庚戌

淳祐十一年辛亥

先生二十歲試吏部銓第十三人見癸辛雜識又爲
國局嘗祠禘充奉禮郎兼太祝見齊東野語已上二
事無年月以皆紀門蔭故繫作令之前

淳祐十二年壬子

先生二十一歲官義烏令見武林舊事提要云淳祐

末年嘗官義烏令故剡源集有周義烏象贊圖繪寶
鑑則云寶祐間爲義烏令蓋就到官後言之先生以
大父澤初調建康府都錢庫自是六上辟書幾漕京
閩幕府由豐儲倉口改秩陞朝出宰婺之義烏見自
銘癸辛雜識亦云嘗爲京尹幕當在此年之前

寶祐元年癸丑

寶祐二年甲寅

先生二十三歲外舅捐館見齊東野語

寶祐三年乙卯

先生二十四歲父守鄞江見癸辛雜識前集

寶祐四年丙辰

寶祐五年丁巳

寶祐六年戊午

開慶元年己未

先生二十八歲得辭尙功摹鐘鼎款識真蹟於外舅
泳齋書房見都穆鈇網珊瑚

景定元年庚申

先生二十九歲客輦下會菖蒲節偕一時好事者邀
趙子固各攜所藏買舟湖山相與評賞飲酬見齊東

野語

景定二年辛酉

先生三十歲夏足瘍發於外賺涉秋徂冬不良於行
見齊東野語

景定三年壬戌

景定四年癸亥

先生三十二歲春治檄荆谿郡僚載酒相慰薦見贊
洲漁笛譜自銘云景定限民田毘陵數最夥朝命往
督之至則除其浮額十之三大忤時宰意禍且不測
會母病卽日歸養醫藥剗體捐年再歲卒罹憂棘盡
心葬禮輯慎終篇五卷然則先生丁母憂在景定五

年矣

景定五年甲子

先生三十三歲夏霞翁會吟社諸友逃暑於西湖之
環碧園先生賦采綠吟見蕢州漁笛譜

度宗咸淳元年乙丑

先生三十四歲秋晚同盟載酒爲水月游先生賦秋
霽見蕢州漁笛譜十月游大滌洞題詩於蓬山堂見
洞霄詩集先生與陳厚韓翼甫李義山咸淳初爲運
司同俱有吏才見清容居士集師友淵源錄

咸淳二年丙寅

咸淳三年丁卯

先生年三十六歲七月旣望偕同志放舟邀涼於三
匯之交脩太白采石坡仙赤壁故事嘗賦詩三百言
歲未除三日棄輿權訪李商隱周隱於餘不之濱賦
渡江雲見蕢洲漁笛譜

咸淳四年戊辰

先生三十七歲子鑄五歲病骨蒸勢殆甚見齊東野
語

咸淳五年己巳

咸淳六年庚午

咸淳七年辛未

先生四十歲首夏以書舫載客游蘇灣園賦乳燕飛
見蕢洲漁笛譜

咸淳八年壬申

咸淳九年癸酉

先生四十二歲冬會疏清翁孤山下出所藏逃禪雙
清圖先生次韻柳梢青四闕見蕢洲漁笛譜

咸淳十年甲戌

先生四十三歲春爲豐儲倉病瘥連日不出見癸辛
雜識續集志雅堂雜鈔夏丞相番陽馬廷鸞乞去出

寓六和塔先生閒日必出問之見癸辛雜識

帝景德祐元年乙亥

先生四十四歲秋秘書監丞黃恮汝濟以蓬省句點
邀先生偕行於是登祕閣見所藏法書名畫見齊東
野語雲烟過眼錄

端宗景炎元年丙子

先生四十五歲甲戌冬王沂孫別先生於孤山之下
次冬先生游會稽相會一月又次冬先生自剡還執
手聚別沂孫賦淡黃柳見絕妙好詞花外集

景炎二年丁丑

帝昺祥興元年戊寅

祥興二年己卯宋亡

元世祖至元十七年庚辰

至元十八年辛巳

至元十九年壬午

先生五十一歲五月二十八日杭城金波橋馮氏火
作次日勢益張雖相去幾十里惶惶不自安時楊大
芳潘夢得皆同居相慰勞毋庸輕動先生挈家湖濱
是夕四鼓遂成焦土見齊東野語

至元二十年癸未

至元二十一年甲申

至元二十二年乙酉

至元二十三年丙戌

先生五十五歲成弁陽詩見剡源集三月三日先生
修蘭亭故事合徐天祐王沂孫戴表元陳方洪師中
仇遠白珽屠約張模孫晉曹良史朱棻凡十有四人
共讌於楊承之第之流觴曲水探韻賦詩見剡源集

至元二十四年丁亥

先生五十六歲九月偕錢菊泉至天聖觀訪褚伯秀
遂同道士王磐隱游寶蓮山韓平原故園見郎瑛七

修續彙引癸辛雜識游閱古泉記

至元二十五年戊子

至元二十六年己丑

至元二十七年庚寅

先生五十九歲正月二十九日癸酉送女子嫁吳氏

見癸辛雜識續集

至元二十八年辛卯

先生六十歲孟春編齊東野語見剡源集戴表元序

至元二十九年壬辰

先生六十一歲自銘云偷生後死甲子且一周是用

飾巾治棺以俟考終或火或土隨時之宜歸祔先塋
以遂首邱之志是先生自銘在至元辛卯壬辰間清
容居士集有復菴銘云弁陽老人周公謹父卜終老
之丘於先中丞公墓左築室其上揭名曰復菴卽其
時也

至元三十年癸巳

先生六十二歲九月觀楚辭見志雅堂雜鈔

至元三十一年甲午

先生六十三歲夏玩易見志雅堂雜鈔自銘云所居
有志雅堂浩然齋弁陽山房所著有經傳載異浩然

齋可筆齊東野語臺閣舊聞澄懷集武林舊事詩詞
叢談及詩文樂章等今經傳載異可筆臺閣舊聞詩
詞叢談均佚矣

成宗元貞元年乙未

先生六十四歲還霽省墓杼山見癸辛雜識別集松
雪爲先生作雝華秋色圖見曝書亭集

元貞二年丙申

大德元年丁酉

大德二年戊戌

先生六十七歲二月廿三日與霍肅郭天錫張伯瀆

廉希貢馬昫喬簣成楊肯堂李衍王芝趙孟頫鄧文
原集鮮于伯機池上觀右軍思想帖真蹟見郁逢慶
續書畫題跋記按松雪齋集又有次韻周公謹見贈
及部中暮歸寄周公謹二首則松雪與先生往還甚
密也

大德三年己亥

先生六十八歲據先生所遺王大令保母帖卷跋云
辛卯之秋余同伯壽過浩然齋弁陽翁俾賦詩題此
卷今已九春秋矣詩尙未就良可一笑然今公往矣
壽甫其寶之趙由初重題大德三年子月十日則先

生沒在此年前也

余作草窗年譜據趙跋謂先生卒於大德己亥年六十七及檢疑年錄下方有海鹽吳子修注至大戊申年七十七尙無恙亟取雜識重讀亦無確證惟別集下卷第二條錄高炳如與妾銀花帖最後云事余七十七歲老人其末先生自述余及炳如之歲室中散花之人空也意子修所據蓋此由七十七歲故推知爲至大戊申耳然其帖始稱六十七繼稱壽余七十未必指最後年歲且以無妾自明其專指炳如年六十六始有妾時言情事尤合

趙跋不謬也恐援子修說難余故辨之如此

過雲樓書畫記卷第三

元和顧氏

書類三

楊鐵崖海棠城詩卷

行書二十七行記已酉春正月十三夜夢至海棠城事
及詩二絕有海棠城郭君須記熟到胡麻第二番之句
彷彿王子高夢游芙蓉城故事以後自識二十二行稱
是月望日會稽抱遺老人楊維楨在雲間挂頰樓筆識
以遺吾鐵門諸弟子云按乙酉爲明太祖洪武二年先
生自云吾自行年七十有四以明史文苑傳卒年七十
五推之明年遂作紫微絳闕之游海棠城主所謂自茲

十九年後當至此簡余主者亦復恟恍無憑矣惟辰鉤
子之稱意指先生母李氏夢金鉤自月墜於懷事見清
江文集鐵崖先生傳傳又云家隱三吳屢遷其居曰草
玄閣曰藉景軒曰挂頰樓其曰小蓬臺者以紹興之山
有蓬萊示不忘鄉里云卽所稱挂頰樓及卷首有小蓬
臺印是也嗚呼靈芝宮殿招平甫於夢中兜率仙山待
樂天於海上文人慧業自古已然不得以游戲三昧目
之末有天啟丙寅五月後七龍宮仙史詹景鳳跋往歲
從歸安吳親家退樓見一卷與此正同而字體略小當
時書遺鐵門諸弟子合有數本良無可疑景鳳字東圖

休甯人見書史會要

楊鐵崖芝庭處士虞君墓碣銘冊

元末常熟富民有福山曹氏半州徐氏芝溪虞氏世所
稱虞宗蠻是也今芝塘東南有地名賀舍花橋鹿皮弄
相傳皆虞氏故迹見柳南隨筆此小玲瓏山館藏廉夫
爲虞德章銘首云世家常熟之芝川末敘平生好義事
有喪者施楫疾病妊媿者給藥餌饘粥告急於門者未
嘗以有亡爲解猶見當時貲財雄鄉里情形文存鐵崖
漫稿考漫稿又有虞屋墓志亦云葬虞山西麓小澗未
知真蹟尙在人間否延津雙劍尙有合時鐵史有靈亦

當撫掌

雪菴和尚書昌黎山石詩卷

此卷自坐階至終篇雪公筆也末署至元丙戌秋八月
上弦雪菴道人書余按雪菴有字要一卷自署圓悟慈
慧禪師資善大夫昭文館大學士李溥光雪菴見錢遵
王讀書敏求記所書沈著古勁兼玉局雙井之長惟首
八行原缺倩同年何子貞太史補之書畢謂余曰頗得
蔬筍氣否乃言猶在耳而子貞墓門宿草矣良用憮然
俞紫芝臨定武楔帖并詩卷

子中是卷行款詩跋俱詳吳子敏卞令之繆文子三家

著錄後有王若林觀款順甫夢樓題跋夢樓謂此卷紫芝自題曰特健藥蓋深有會於定武之健舉者親家吳退樓已据輟耕錄引墨藪載徐氏書記云題云特健藥是虜語其書合作者辨之余按特健藥三字本唐太宗舊題二王真跡皆有之故研北雜志云顏魯子侍郎之孫家有鍾紹京書黃庭經紙尾題特健藥三字爲鍾所見黃庭有此之證此子中所臨稷帖亦必是宋搨定武出於湯普徹者故與宋仲溫家藏本同仲溫跋云特健藥乃梵語云合作耳知宋搨有此三字矣仲溫跋宋搨定武亦見寓意編足爲是卷左證因詳著之順甫嘉道

間人非白華樓茅順甫也

俞紫芝小楷書春秋左氏穀梁傳詩柏舟小序禮檀弓
記冊

是冊載吳越所見書畫錄後有王惕甫題記余謂此子
中氏之春秋也彼見奇渥温氏至英宗以後有欲言不
敢之隱乃雜錄傳記以寓褒貶心甚苦已今試略舉數
事如觀魚之諫泰定帝之出畋柳林得疾還宮而諸王
滿禿阿馬刺台謀立懷王也趙盾之弑君太子阿刺吉
八之不知所終也子臧之逃叔臍之不食祿文宗之遣
哈敦迎大兄周王於漠北而明宗和世球暴崩於王忽

察都也叔姬之歸其姜之誓燕帖木兒之取泰定后八
罕氏爲夫人也故引胡傳仲尼作春秋以寓王法云云
以見其意又引巽岩李氏左氏將傳春秋乃先采集列
國之史云云以明其例凡譏切時事瞭然可見所與之
者惟至順時命趙世延等纂修經世大典耳則韓宣之
觀書季札之觀樂皆其事吾故以子中爲大元之南董
而是冊爲蒙古之陽秋也冊共十三幅陸氏以十一幅
入錄者失檢觀樂二幅之故後世勿以過雲樓所藏與
懷烟閣有異而疑之

揚彥明五體千文冊

首鍾鼎書五體千文及敕員外散騎侍郎周興嗣次均
十六字已下皆真艸鍾鼎篆隸書之自跋云宋紹興間
錢塘薛尚功嘗集鍾鼎款識寫孝經等書逮國朝趙文
敏又用真艸篆隸書千文刻於祕省暇日因益以鍾鼎
篆文遂成五體云云考薛用敏有鍾鼎彝器款識帖二
十卷紹興十四年甲子六月郡守林師說爲鐫置公庫
見曾宏父石刻鋪敘据此尙有手寫孝經足廣異聞至
文敏四體千文則郁逢慶續書畫題跋記亦載爲錄事
焦彥實書於松雪齋卷特未必卽祕省所刻耳末署至
正二十六年龍集丙午秋七月望日澗河揚倫倫字彥

明見虞愷揭泐跋又豫章來復跋云彥明以儒選起佐
厓州其仕履略可考見如此愷無考泐字伯防僊斯子
官至燕南廉訪副使釋來復字見心番陽人見書史會
要並志及之俾與鈐山堂書畫記載松江顧氏所藏文
敏六體千文並傳也

元人靜學齋詩冊

是冊爲繆文子舊藏同時高江村亦藏卷子有蘇大年
勾吳周砥范致大潯陽陶處仁王直題記卽其上冊不
知何時析而爲二一吳一越不能胖合至吳子敏作大
觀錄已失陶王二家今且莫測其所之矣冊中題詠十

四家所可考者陳聚臨海人爲陳基之兄基少與兄受業於黃潛孫作字大雅江陰人洪武初爲國子監助教遷司業並見明史文苑傳張端字希尹有溝南先生詩見高啟鳧藻集文信字道元少與茅山道士張伯雨前進士會稽楊廉夫齊名嘗有西湖竹枝詞見王逢梧溪集李繹字叔成錢塘人嘗仕張氏見甫田集王謙字鳴吉姑胥人以春秋學爲府學教授與范成俱有詩見朱存理鐵網珊瑚焦愷王賓虎丘山志有詩曇徽徐達左金蘭集有詩並見元詩選餘如虔亭翟克讓延陵吳淵廬江王元輔廣陵趙文彬古汴孟熙皆無聞靜學二字

本濂谿性靜者可以爲學之語故元人每以名齋觀宋
學士集有記則云錢唐羅宗禮名其絃誦之室曰靜學
方孝孺遜志齋集有賦則云何朱氏之好修兮先□□
之中情取靜學之嘉名兮銘齋居而服膺鳧藻集有銘
則云子居是名矢則先正我維銘之請直以敬合徐積
是冊已有四家宋學淵源流傳不絕可以於此徵之

李忠文詩卷

潁水流寒盡日東潁監廉白勵貪風化行墨綬蒲鞭外
身在冰壺秋月中吏靜竹聲驚鳥雀官□梅影上簾櫳
虛舟歸載惟琴鶴擬看英名徹兩宮此元江州守李忠

文詩墨而明錢塘朱灝得諸弊紙中裝卷徵題者也考
朱跋載忠文彌勒何神降禍胎詩今見艸木子又士人
常明善弔四狀元詩今見輟耕錄詩中宗哲何如兼善
死公平爭似子威高陶南村釋云元舉王宗哲字也至
正戊子科三元進士時爲湖廣憲僉兼善秦不華字也
時爲台州路達魯花赤公平李齊字也時爲高郵府知
府子威李黼字也時爲江州路總管此四公者或大虧
臣節或盡忠王事或遇難而亡故云足以申析是跋之
義惟跋云錄歐陽圭齋所撰本傳於卷首而卷中厯存
太常博士張翥謚議並無此傳檢圭齋文集亦無之祇

七言絕句有喜門生中狀元詩序云泰定乙卯八月十
二日崇天門傳臚賜進士右榜第一人阿察赤左榜第
一人李黼皆肄業國學日新齋余西廳授業生也知忠
文爲主齋門生而已余謂元史出宋文憲手文憲亦主
齋門生其爲忠義傳必采師說卽謂所誤傳尙存可也
卷後題者二十九家胡滌章做楊士奇楊溥黃淮楊榮
羅汝敬王直金寶周敘周述王英李時勉錢習禮陳繼
陳敬宗胡儼陳循高穀聶大年明史皆有傳餘如胡粹
中名由以字行山陰人永樂初官楚府右長史苗衷字
秉彝定遠人永樂辛卯賜進士第二官至尙書張楷字

式之慈溪人永樂甲辰進士擢都察院右僉都御史有
和唐集見御選明詩曾棨吉水人甲申狀元以少詹
事兼侍讀學士卒陳璉東苑人以吏部左侍郎終並見
弇州山人續稿云

五大僧字卷

卷爲中峰明本虛谷希陵元叟行端東嶼德海及正印
書浙翁示妙心禪者法語之後今其語已佚明本諸人
見續燈正印見朱珪名蹟錄旅泊行者先我言之矣余
續考得明本號中峰錢塘人俗姓孫氏投天目山受法
高峰原妙禪師雲游還師子院詔賜金襴伽黎衣進號

佛慈圓照廣慧禪師至治三年逝敕諡智覺希陵字西
白義烏何氏子出家東陽世祖召見賜號佛鑒成宗加
號大圓仁宗加號慧照至正壬戌說偈而逝諡大辯有
瀑巖集行端字景元一字元叟俗姓何氏臨海人大德
間出主湖之資福至大中特旨賜號慧文正辨行宣政
院舉主天竺遷靈隱延祐中加號佛日普照泰定間降
璽書命主徑山見黃文獻集徑山元叟禪師塔銘正印
大德間住澱山寺至治中卓錫吳興俱見 聖祖仁皇
帝御選元詩姓名爵里中引首有江鐵君篆解人難得
四字後有鐵君六言佛偈四句跋之因說偈曰達摩之

教不立文字誰示眾妙法門不二何時解脫還我本來
山空木落水流花開

釋思訓自書詩卷

行書五古一章末署至正六年龍集丙戌三月廿又九
日書於不二堂之留客軒無姓氏祇師訓道林二印及
詩中近引地天竺迺在虞山郵適我錢唐游重把靈蹤
追之句知爲烏目山僧而卓錫浙中者然明龔立本松
窗快筆納羽門無之則其名不傳久矣詩十八韻尙無
酸餽氣且通幅無斂文譌字惟無地容驅馳句誤作馳
驅而已因其尙是元人墨蹟存之俾與雪竇和尙親書

詩並傳也

宋仲溫書陶詩卷

高啟鳧藻集南宮生傳云素工草隸逼鍾王患求者眾
遂自閤希復執筆是仲溫書當時已不可多得此爲雲
間徐彥民書陶詩四十四首用紙二十番首署晉陶靖
節先生詩東吳宋克書末作竹石小幀真書僕來雲間
館徐彥民寓所日月相與談笑幾踰四旬彥民酷愛鄙
字乃以四體書陶靖節詩一卷餘紙尙多遂戲寫竹石
小景僕素不精此聊復弄筆而塵俗之氣一洗盡去雖
不入時流之目識者自能辨之庚戌九月廿四日燈下

記之又行書時年四十有四庚戌歲也按庚戌爲明太祖洪武三年上推仲溫當生於元文宗天厯元年仲溫自言不精寫竹而倪瓚雲林集題宋仲溫竹枝云畫竹清修數宋君春風春雨洗黃塵集外詩贈別仲溫高士云宋公天下士畫竹能鼓琴則仲溫亦工此矣又寓意編有宋仲溫書陶詩式古堂書畫考亦載宋仲溫書陶詩并畫竹石卷初疑卽是此卷細勘迺知署款行式以至脫文誤字多從同而行楷書闕時運柴木二首命子下闕九月望日夜宋克書一行急就章體書形影神等十五首全闕又卷後闕天順癸未錢溥萬厯丙戌馮大

受二跋始悟彼卷卽從此影寫而短於章艸遂爾臧拙
溥字原溥華亭人正統四年進士見書史會要大受字
咸甫松江華亭人萬厯己卯舉人有竹素園詩集見明
詩綜

過雲樓書畫記卷第四

元和顧氏

書類四

靖難三忠遺墨卷

三忠者方文忠黃文節及俞先生貞木也先是吾吳有姚敬翁氏當元氏盛時攻苦力學累舉不第遂究心孫吳之術及元季兵興江浙行省辟爲本路兵馬指揮使淮張時隱居林屋山扁其居曰怡顏草堂取泉明歸去來辭意也張敗堂亦燬後二十年其子文靜得舊扁改築於郡城之竹溪時文靜已由邑弟子員中洪武丙子鄉舉爲太學上舍生求縉紳詩文張之於是方爲草堂

記黃爲記醉歌辭以敬翁旣與時不偶縱酒自恣飲醉
輒以杖擊樹而歌也俞爲書詩卷後及靖難兵起方黃
皆殉惠帝難故文後割裂姓氏年月惟俞文尙完然亦
滅去建文年號矣三忠如方黃明史有專傳獨俞附見
姚善傳祇善遷蘇州知府吳中大治好折節下士敬禮
隱士王賓韓奕俞貞木錢芹輩數語惟劉鳳續吳先賢
讚錢芹俞貞木傳云靖難時勸守舉兵因逮赴司空論
文震孟姑蘇名賢小紀俞都昌先生亦靖難時勸守舉
兵竟以死殉則與方黃並稱三忠刻入貝氏千墨菴帖
可無媿色獨羨吾吳姚氏宋有三瑞堂得東坡詩而不

朽明有怡顏草堂得方黃俞三忠文而亦不朽潛德幽
光輒賴正人君子以發洩之何其幸哉

吳文定自書種竹詩卷

匏菴先生自書種竹詩具見本集七古云成化庚子夏
予從城內護國寺分竹六莖種之遂爲初祖因作此詩
五古云記園中草木有詩二十首內竹爲筠隱翁所分
種者因附錄之七律云次韻陳給事種竹又雨中對竹
又五月十三日故園種竹時舊竹俱亡醫俗亭亦撤去
擬別搆數椽名之曰復竹五律云賦叢桂堂前矮竹分
別部居不翅爲綠卿青士作氏族志世系表矣据署款

七古爲弘治甲寅正月十七日書有云筠隱翁性好竹
他日致素卷求書聊爲執筆時入夜已深兒爽侍立數
剔鐙艸艸不成字也是歲爲弘治七年先生政六十五
古已下爲戊午秋在吏部右廂書有云近稿有此數首
公餘更錄歸之是歲爲弘治十一年先生且六十四矣
先後所書一千餘字文不加點通幅惟奪一俗字耳爽
字嗣盛見震澤集吳爽字嗣盛說又有半舫齋種竹詩
亦次韻自注玉汝齋名知陳給事爲玉汝家藏集屢稱
陳玉汝是也集中有醫俗亭記又有吏部右廂前種竹
及吏部右廂前有朱藤一株予手種也今歲始聞花開

甚盛詩皆與此卷脗合卷首文壽承隸書筠窗雅玩四字尾有壽承及長洲徐顯卿跋顯卿字檢菴隆慶二年戊辰羅萬化榜進士亦官吏部侍郎見府志選舉門嚴介溪贈王子儀詩序冊

甫田集太傅王文恪公傳稱子男四人延喆大理寺寺副延素南京中軍都督府經歷素卽子儀喆卽序所稱子貞也此序首書贈王君子儀考績壽親詩序末署嘉靖二年癸未仲冬之吉賜進士出身南京翰林院侍讀前經筵講官同修國史分宜嚴嵩序考明史姦臣傳稱嵩授編修移疾歸讀書鈴山十年爲詩古文辭頗著清

書四
三
譽還朝進侍讀署南京翰林院事其時頗善矯飾以名
節自厲故守溪卽以賢士大夫待之觀震澤集鈐山堂
銘及鈐山堂集贈王子儀序大概可見今以集本勘之
如序中日惟勘書著文下有以寓其所好貫綜百氏藻
績萬物其言滿家十七字而集無之子儀公之仲子也
下有與其伯兄中書舍人子貞俱以蔭補官十五字而
集亦無之惟据集校正起居誤作居起華章誤作章華
而已獨不解嵩爲此序於守溪高風峻節極知仰止且
有公在正德初入筦機務值權姦柄國奉身而退之語
而先後矛盾言行鑿枘身敗名裂卒爲淑人君子所不

齒嗚呼二十年相業塵傳天水冰山之錄縱守溪不及
見甯不有媿於子儀耶蓋贈子儀序時守溪已七十四
越明年考終里第明史本傳所謂嘉靖三年卒年七十
五是也守溪沒後又三十八年而嵩敗計其時子儀當
在回思進坐廟堂退處巨壑之言能無汗顏頹泚乎序
都四十行字畫端勁幾入歐顏之室故嘉慶間蔡生甫
楊蓉裳兩跋多稱之

祝枝山楷書擬詩外傳卷

米襄陽書爲有宋一代之冠而挹其滴髓者草則吳雲
壑楷則祝枝山此擬詩外傳二十一則匪惟文筆出入

周秦諸子得孫况呂不韋說詩之遺其書亦與寶晉齋
代興矣後記正德十一年歲在丙子五月二日偶在縣
署之念茲齋畏暑獨坐檢得舊作擬詩外傳數篇遂書
之素卷不特謂古人作字忘暑亦可徵縣治之可羅雀
也考枝山卒於嘉靖五年丙戌年六十七上推正德丙
子是年五十七歲以集略五卜服官政效白公詩吾年
五十五始受一縣寄計之知宰興甯時歲在甲戌年五
十五興甯縣城隍廟碑云歲乙亥予來宰興甯者實到
官之二年丙子其三年也

祝枝山九愍詩卷

行書九愍九首代江南水災謠水詩對酒各一首款署
枝山允明書似桐蔭園主人桐園者王君世材家吳城
之甫橋旁有園植桐盈之乃自稱云見祝氏集略桐園
記又九愍下題云庚午陳吳中民瘼作九愍按庚午爲
武宗正德五年是歲吾吳大水明史五行志所謂五年
十一月蘇松常三府水是也詩均見集略舊爲陳良齋
家藏

祝枝山行楷書正德興甯縣志冊

正德興甯志四卷都四十葉葉十八行行二十一二字
據序目首郡縣建置因革分野疆域至到城隍鄉都山

川次官署學校廟墀宮室坊陌津梁步寨寺觀古蹟次
戶口風俗人材物產征賦又次職官文辭雜記明代地
志大判祖尙韓邦靖朝邑康海武功以陋略爲簡荒率
爲古繇士夫間皆原伯魯之徒故古法蕩然也希哲此
製乃其爲縣時作明史本傳但云授廣東興甯知縣捕
戮盜魁三十餘邑以無警意纂修志乘事細略之然菽
文志地理門亦不載此目恐當時已成斷種秘本矣今
考謝雍手鈔本枝山文集有循州春雨及戲作口號云
道惠何曾惠言甯又不甯卽志所謂宋熙甯五年隸循
州元元貞元年改屬惠州路也又有游和山磨石巖及

神光山卽志所謂神光山在縣西南七里和山在縣東
北二十里下有大巖曰磨石巖也又有吉湖湯泉及羅
翰林墨池銘卽志所謂吉湖在縣西北二十里墨池在
縣南十里羅孟郊舍其傍滌硯於池池水盡黑也又志
爲當時手稿故鉤校塗乙朱墨爛然且坊陌步寨寺觀
人材職官雜記諸門於書眉皆有增注又人材下有科
第門而序曰奪寫希哲自序所謂纂事如追亡搜匿唯
力不足刊繆若理疾恆病不得其情故其序次謹嚴考
核翔實有可稱者又按祝氏集略有與施聘之僉憲書
云興甯志附上聞後政頗有增益或得命印一二本寄

下然則是志當時有刊本矣惜無從得而校之冊舊爲
王麟洲秘篋中物有瑯邪王敬美氏家藏圖書印

祝枝山懷知詩卷

京兆自書懷知詩自王文學履吉至宋文學堯民凡近
體九首四言古詩八首末云在野史妹丈往隨省親一
絕附錄卷尾弇州山人四部稿復初齋集均已著錄余
以集略校之始知卷首脫去數行今爲補之小序云臥
病泊然緬懷生平知愛遂各爲一詩少長隱顯遠近存
沒皆非所計祇以心腑之眞凡十有六人共詩一十九
首又標同老十八首顧明府榮夫云雞山燕市每依依

此日都拋入洛衣家近鬱林公舊隱門如彭澤令初歸
空憐舊社惟君密卻笑無車訪我稀最愛滄浪池水好
幾時同坐一方磯次錢太常元抑云入室芝蘭始見熏
也知孤陋令離羣煙霄本自冥黃鵠城郭安能駐白雲
震澤晚山青歷歷漕湖秋水碧沄沄相思只借中天月
合把清輝兩地分以下方接王文學履吉集略行世甚
少故缺佚無知之者亟錄之以完懷星堂名蹟末附在
野省親詩集略所無但有史在野墓誌云在野爲余女
弟之夫氏史諱臣字在野吳縣人也又云史氏自處士
浩生今隨州守引之甫室張夫人生在野爲冢嗣隨州

往任在野守廟墓於家嘗一往省於隨皆與詩相合至
卞令之式古堂書考有黃姬水跋稱其深得鍾王筆法
云云乃珊瑚網所稱項氏物逸去歲寒十人姓名者非
此卷也

唐子畏漫興詩軸

漫興古作漫興特宋以來多譌興字明人承之子畏自
書乃漫興十首之一云龍頭獨對五千文鼠跡今眠半
榻塵萬點落花都是恨滿杯明月卽忘貧香鐙不起維
摩病櫻筍消除穀雨春鏡裏自看成大笑一番傀儡下
場人以校袁宏道本唐伯虎集則首句作馳驅南北罨

頭塵襪褸衣衫墊角巾下亦字句微異据公安云余見其親筆行書者兩處互有不同此殆其一耳有傳經堂含碧樓花步劉氏諸藏印

文待詔曹君墓誌銘卷

小楷書三十一行行二十三四字不等首題涇南曹君墓志銘結銜署前翰林院待詔將仕郎兼修國史長洲文徵明著据志曹君諱釧字子堅蘇之吳邑人世居洞涇里之南因號涇南生曹氏自大城教諭瀚以來傳業相仍至按察僉事嵩以進士起家敷歷中外釧學諭公會孫按察公從子也考嵩字元潔成化進士見江西通志

餘無考衡山此志亦不載於甫田集然集中不載者尙有陳以弘志銘當時刻石留落乘鯉坊民家民婦誤以甕器置其上是夜寒熱譫語若有物憑之者責婦不當擅汙此石民家大恐移送西鄰禪興寺中堯峰文鈔記其事昔晏元獻見鄭文寶書取白樂天語書其後曰此詩在在處處有神物護持吾於衡山信之矣

文待詔落花詩卷

弘治甲子春石田首倡落花詩衡山迪功和之旋衡山隨計吏南都又屬呂太常秉之再和金春玉應備極喁于之盛石田又各有酬報先後累至三十篇是歲十月

衡山以精楷書之都四家六十篇自爲跋語其後董思翁陳眉公均有題記庚申前歸吾鄉張研樵研樵因眉公有書法永師畫宗趙伯駒松雪之語知舊嘗有圖遂以大青綠補之雖未能希蹤二趙望而知爲衡山替人也研樵名培敦工詩畫精鑒別嘗於所居胥門外築小樓榜曰如畫自撰聯云繞郭有山皆入畫登樓無客不成詩春秋佳日每與賓朋游讌其中乃琴尊未冷芳草成塵五十年來風流闐絕余亦垂垂老矣

又落花詩卷

是卷視前小及其半用金粟山房藏經紙亦烏絲闌書

祇跋中節去而先生爲是四句其餘皆同甚至添注三字亦悉相合蓋一時所書後有更定遂兩卷並改之耳昔夢臆詠琴川慧日寺蠟梅云蝶粉蜂黃大小喬一般清瘦各無聊今吾樓合此兩美政如銅臺雙影深鎖春風又何僧廬臘花之足羨哉

雅宜山人游包山詩卷

御覽引吳地記云包山在縣西一百五十里中有洞庭深遠世莫能測道書所謂第九洞天也銀房玉柱窈窕仙都翠巘丹崖豁摩靈境雲山幽勝在於煙水窟中故自奇絕此爲雅宜山人烏絲闌晉唐小楷書游包山集

白旦發胥口經湖中瞻眺過石公山入消夏灣登縹緲
峯入林屋洞爲詩二十五首末云庚辰歲游包山距今
丁亥八年矣補菴先生見索復錄一過殊足愧也後有
補菴居士跋丙戌之冬雅宜過余梁鴻溪上因以佳箋
乞爲楷書閱明年二月一函遠寄喜極欲狂云云知此
卷爲華補菴書補菴名雲字從龍無錫人嘉靖甲辰進
士歷刑部郎中與唐荆川司諫爲友見萬姓統譜荆川
文集有與華補菴郎中書是也庚辰爲明武宗正德十
五年雅宜游包山至世宗嘉靖六年丁亥始爲補菴書
此据甫田集王履吉墓誌銘生宏治甲寅卒嘉靖癸巳

享年四十推之庚辰年二十七丁亥年三十四盛年篤
學文壽承謂是極力用意之作良非虛語至玉雨堂書
畫記亦有雅宜游包山詩卷爲補菴書乃是絹本草書
且後丁亥一年自跋嘉靖戊子可證特不解補菴於此
詩索書至再豈以包山爲雅宜習游之地据其所作以
當導師丙洞耶曲巖耶毛公壇胡道泉耶俱可從目想
神游得之則有此兩卷不勝於向龍威丈人取靈寶經
正機平衡飛龜授秩三篇也哉

錢叔寶手寫唐朝名畫錄

郁逢慶續書畫錄跋記載豐道生真賞齋賦序稱華中

甫所藏有唐名畫錄五代名畫補皆傳自宋元遠有端緒則宋槧也叔寶此本或從中甫借鈔黑格子楷書每半葉十二行行二十四字序目外首署唐朝名畫錄吳郡朱景玄撰末署嘉靖乙未冬十月八日彭城錢穀世重鈔完藏於家又云計十六葉間用朱筆塗改譌字並加校語如王宰傳云員外贈歌之王宰安得貞元尙在作韋令客劉商傳云畢宏自在劉商前未知卽叔寶筆否余以景玄自序以張懷瓘畫斷神妙能三品定其等格上中下又分爲三其格外有不拘常法又有逸品以表其優劣之語從太平御覽工藝部所引唐畫斷校出

妙品陳閱傳當作陳閱逸品李靈省傳當作李靈雀又
從太平廣記畫部引唐畫斷校出神品周昉傳劉宣按
武圖當作劉宣武按舞圖韓幹傳上令師陳閱當作陳
閱重驛累至當作重譯妙品范長壽傳人間多有令屏
風當作月令屏風張萱傳又畫長門怨詞攄思當作約
詞攄思惜余垂暮之年炳燭末光不能詳校影刊徒呼
負負然叔寶有知當亦許爲知已矣景立會昌人見新
唐書藝文志玉海藝文部引名賢畫錄云閣立本圖秦
府十八學士圖凌烟閣二十四功臣輝映今古惟職貢
鹵簿等圖與立德同製之取校立本傳悉合則宋世亦

稱名賢畫錄古籍流傳已足寶貴况經懸磬室藏者耶
又是書爲汪閬原舊藏有頻迦題簽亦可記也

董文敏臨黃庭經小楷卷

米元章寶章待訪錄載褚遂良書黃庭經云右閬綠綾
所書丁謂孫倩處質在無錫民家此卷思翁自云從褚
河南綠綾本臨摹温潤虛和超唐人晉凡千一百餘字
首尾如一筆書絕無先後作輟之跡殆生平傑構也後
有眉公跋云此爲于蕃臨于蕃姓項李竹嬾畫勝有爲
項于蕃畫是也思翁爲于蕃書屢見容臺集有云于蕃
寓書於余謂以好收余書囊爲之澀又稱于蕃賞音者

不欲自藏其技此卷亦爲于蕃書者徇知之作特見經
營王虛舟推爲董書第一信然

董文敏臨樂毅論冊

香光臨樂毅論以高麗紙界烏絲書之迴腕藏鋒極得
右軍父子神髓余考畫禪室隨筆云樂毅論梁世所摹
與唐摹字形各異余家戲鴻堂帖唐摹本也又有一本
唐摹在長安李氏曾屬予跋恨梁摹白麻紙真跡爲新
都吳生所有云云式古堂書考又載香光題梁摹樂毅
論云余所見樂毅論宋搨本及唐貞觀摹真蹟二本皆
無付官奴三字獨此有之初甚完好聞吳氏購時主人

故漫之殊可惋惜智永跋所云梁世摹出天下珍之卽此帖也此本亦有付官奴三字當是香光臨吳氏所藏梁摹本無疑故與書史會要所云羲之嘗書樂毅論一篇後題云賜官奴卽獻之小字合若符契也吳氏爲吳周生太學工書博古見容臺集中

董香光臨東坡叔黨父子帖冊

帖後有狄億跋云思翁此帙是用全毫筆魚油墨所做者故能獨得蘇家三昧是已余更考甫田集有跋東坡五帖叔黨一帖云二帖皆與忠玉提刑當是自杭赴召途中與王忠玉者又次歙硯帖亦元祐四年在杭時書

思翁所臨卽此二帖而舍所謂與郭君廷評及食蠓帖耳後接臨叔黨詩二祝氏集略跋蘇文忠五帖云帖在朱子儋所後一帖爲叔黨題郭熙平遠三絕與妮古錄所見相同蓋以合裝故并臨也思翁習於蘇家筆法又於甲寅十月觀東坡叔黨此帖於吳閫舟次所謂吳性中從項氏探此驪珠勿遂落好事手宜搨傳海內共賞之者故非尋常臨摹可比余於大觀錄載思翁跋知之熊襄愍東園十詠卷

往余觀察武昌於襄愍故鄉得公行書東園十詠款云庚申臘以勘從遼陽歸辛酉初春多兩日在東園蒔花

移樹課鳥豢魚因仿初唐連珠體偶成十詠卽本傳熹
宗初立以御史馮三元張修德給事中魏應嘉之劾回
籍聽勘時也又云纔至夏首召書以遼瀋陷沒起予倍
極痛悔至云勉爲朕一出而予大哭信宿就道卽本傳
天啟元年瀋遼破乃復詔起公於家至六月入朝遂進
兵部尙書兼右副都御史駐山海關經略遼東軍務時
也又云今相隔一年所而身繫名辱卽本傳二年正月
大清兵入廣甯二月逮巡撫王化貞罷公聽勘時也又
云病起偶檢此詩不覺愴然因爲吾起南兄一書以誌
感云時壬戌六月六日也公詩世不甚傳據明詩綜稱

有性氣先生集今惟新卜東園一律行世余得此詩非
惟與弁陽翁所藏吳興張氏十詠圖互相輝映且因公
手澤如見投贖於地目光如炬時也寶何如之

范文忠行書卷

文忠爲我 世祖章皇帝表章前代二十忠臣之首署
款云永巖老先生留意書法每與王丈談及墨妙故鬱
燠中謬意臨池請正大方則永巖亦能書者字作褚河
南體相傳咸林有孝廉爲逆闖勒仕作中舍者隨之犯
闕於內閣几上得宋搨聖教序攜歸江東趙子一見而
識之曰此范質公先生故物也然則先生固用力於書

者但冰餐室中大節儼然自足千古正不必論工拙於
泓穎耳末有華亭王氏珍賞及經訓堂鑒藏諸印知王
儼齋畢秋帆亦嘗球璧奉之也

倪文貞十七帖卷

文貞臨十七帖頗極煙霏霧結鳳翥龍盤之妙旁作楷
書釋之據王良常跋云乃倪鴻寶先生所臨格韻清遠
無世俗圓軟態後雖無款定知非先生不能各條後釋
文則南沙秦先生筆間誤一二字余爲補正附注其下
先生工分書直入東漢觀其楷法魏晉風流淵然在目
與鴻寶先生信爲雙璧良常具正法眼藏目爲上虞遺

墨自是定論南沙爲無錫秦道然字雒生康熙己丑進士翰林歷官御史有泉南山人稿其善分隸則虛舟題跋有秦南沙太史臨曹全碑可證云

路文貞手書張承業傳卷

行書五十六行行十九二十字不等首署唐內侍張承業傳明路振飛著蓋公參取新舊兩史爲之以媿當時之爲貳臣者故論中有五代時夷狄盜賊相繼長天下文武將士朝唐暮梁倏又晉漢如逆旅小兒之候過客承業獨欲藉河東之甲兵恢復唐朝之社稷堅持大義至死不移生爲唐臣死爲唐鬼云云與卷後附路文貞

公別傳余生爲明臣死爲明鬼一點忠貞還之天地其語相應可以知公命意矣別傳亦行書七十五行行十四五字末署歲次甲午秋八月廿有六日廬山棲賢寺比丘清浪今釋稽首撰并書爲我 大清順治十一年距公卒六年矣今釋字澹歸杭州仁和人姓金氏原名堡字道隱國亡爲僧事嶺南天然和尚受衣鉢創建丹霞別傳寺見澹園集丹霞歸釋禪師塔銘堡爲給事中居言路有鋒氣以語觸忌與丁時魁並謫戍見明史嚴起恆朱天麟傳爲僧後有徧行堂集今世所傳四十六卷本無別傳當是因有違礙語去之然取校明史本傳

多所未及如本傳云崇禎十六年秋總督漕運巡撫淮揚而別傳有勦劇賊王道善張方造等事本傳云明年四月初聞北都陷福王立於南京而別傳有誅海州賊官吏潘啟遇等叛弁趙洪禎等事本傳云五月馬士英欲用所親田仰乃罷振飛而別傳有撫甯侯朱國弼與公共漕事聞國變挾餉南竄虞公發其覆揚言公棄淮使江右無賴宗子統鑣誣公侵餉倡逃事本傳云順治三年大清兵進仙霞關唐王聿鍵走汀州而別傳有公承命督師安間甫抵其橫敵兵猝至鄭芝龍揚言公已迎降公返天興約其弟定鹵侯鴻逵其子忠孝伯賜

姓成功泛海至五羊事乃知公因謠詠紛來特作此傳
且以自明心迹也卷爲路氏子孫世守向在洞庭山道
光間爲鄉人吳姓所藏吳縣葉明經調笙旣跋其後復
取論與別傳載入所纂鷗波漁話同治中有吳翰書樵
者又屬嘉興唐君蕉菴爲跋蕉菴名翰題嘗宰吳縣及
調署太湖撫民同知乃拜公祠於葑山取公太湖偶作
詩意顏小樓曰謠月又謁公墓於法海塢復取北域石
闌手篆路氏先塋四大字刻而誌之嗚呼杜陵尋丞相
之祠流連古柏宋公修卞令之墓禁絕樵蘇爲政風流
有足述者爲附記於篇末云

黃忠端唐公墓志銘卷

石齋先生以文章風節高天下乃其書亦復出入鍾王
爲書家龍象特當世流傳大抵優孟叔敖虎賁中郎求
其真而精如明誥封朝議大夫禮部儀制司郎中西雛
唐公墓志銘實爲生平僅見也是卷紙凡三接界以朱
闌楷書六十四行乃唐公之子亨子請先生銘者以漳
浦集唐棣之墓誌對校如集本故白甲戌闖賊躡蜀以
來此作闖獻集本達獨無恙此作達獨晏堵人民無恙
集本如搔髮頭上此作如搔竈頸上集本兒輩何足聞
也此作問也集本於是搔黃寇與獻賊雜蹂川東公攜

家退守達此作公攜家入捍城寨避之搖黃從諸寨求
餉不可得悉力破諸寨公攜家退守達集本李悍莫當
處此作莫敢處者集本同爨此間此作無間集本以建
閩口此作閩旌集本正以示無外此本作以示無外中
葉儒衿此其禪繪刊誤補闕類足正集本之失末署龍
飛弘光元年三月朔日賜進士出身光祿大夫太子太
保協理詹事府事禮部尚書兼翰林院學士前吏部左
右侍郎正詹事兼翰林院侍讀學士充經筵日講官纂
脩實錄玉牒通家侍生漳海黃道周頓首識明史本傳
但云福王監國拜禮部尚書協理詹事府事未書兼官

得此結銜足以補之乃知真蹟無在不有裨史學也卷
初爲二林居士所藏有引首及自跋後歸家文學湘舟
有石琢堂殿撰跋最後歸余有何子貞同年跋稱其純
是晉法余每歎爲先生知己

盧忠烈十驥詠卷

詩作於忠烈三十七歲爲明莊烈帝崇禎九年丙子九
月考年譜是歲八月京師戒嚴詔公統兵入衛九月公
至都會 大清兵已退公遂出塞外道中賜御廐五十
匹作十驥詠卷末題云丙子八月奉命統兵入援乃紀
啟行之日又云蒙上賜廐馬五十得上駟凡五又余討

賊中原共選十驥隨之軍中是以有詠乃紀入援後行
邊塞外故追溯從前征剿流寇曰討賊中原惟推校明
史本傳及莊烈帝紀皆無行邊事以本紀考之忠烈以
八月乙未入援次真定九月辛酉改總督宣大山西軍
務行邊塞外當在乙未至辛酉二十六日之中十驥詠
亦作於其時故公詩集以千里雪爲首重御賜也菊花
青爲殿以入援至朝歌所購也而以五明驥次之者本
傳所謂嘗逐賊南漳敗追兵至沙河水闊數丈一躍而
過卽所謂五明驥也知是卷爲塞外所作情事皆合特
以集本校之則次第少有參差文字亦間有異同每詩

之前皆有贊十六字耳

東林五君子書札冊

五君子爲楊忠烈魏忠節繆文貞周忠介忠毅國初
宋西陂尙書得其手札裝池成冊者也後爲二林居士
所藏今冊後有汪大紳羅臺山蔣心餘潘榕皋諸先生
詩皆彭氏所徵題札凡五通魏與雲衢周與字傳無考
惟繆與異度當是張異度名世偉吳縣人萬曆壬子舉
順天鄉試有白廣齋集周與存翁當是韓存良名世能
長洲人隆慶戊辰進士有雲東草並見御選明詩至
楊札在汪文言考竟之後行人詔獄矣所云日前拷問

汪文言招扳至於五毒俱備又用鐵繡鞋迫之死死而復生汪竟未招與本傳稱文言至死不承合五毒曰械曰鐐曰棍曰桯曰夾棍卽刑法志所謂許顯純拷楊漣左光斗者則札中所言忠烈行將自及矣志文相傳出姜湛園手最爲詳覈然無鐵繡鞋等名東廠慘酷至於史不忍書迺知火中鍬斧戴就之內皆焦堂上炭甕周興之囚竟入古人殆不余欺也冊初得之金保三一日偶訪徐燮堂大令齋頭則石刻在焉亟以他畫易歸堪怡園壁間使世知尋聲集後大有遺文碧血錄中非無軼事云爾



